

superiore bello in Hispaniam legatus fuerat, romanam legationem sapius, præcipuosque magistratus cum urbanos provinciales obiverat. Eximiis hisce virtutibus fortuna quoque ipsa favere videbatur, quod in ea involuta comitiorum ratione plures reliquis suffragatores sortitus esset. Competitorum præstantia, Patrum varii affectus electionem protraxere, cum, præter morem, decem ac septem dies in conclavi morarentur: quæ res collegii Patres impulit, ut scripto gravissimis Reipublicæ negotiis exaratis, ad novum Principem renuntiandum electores incitarent, quod, defuncto Principe, ex lege, nisi successore creato, Senatus cogi non poterat. Tandem nono kal. maji Marinus Grimanus Princeps creatus, ingenti adeo civitatis lætitia, ut insuetis acclamantium populorum vocibus, illius ac familiæ undique nomen personaret; eoque infimæ plebis levitas prolapsa est, ut tribunalia magistratuumque publica sedilia in medium abstracta forum concremarit: neque alio unquam tempore adeo sese popularem licentiam libidinemque extulisse memorabatur: Quæ ex re quinque corrigendis legibus Senatores præfecti, his initiis, ne pessimo exemplo essent, obviam eundum censuere. Majoribus comitiis severioribus legibus in petendo principatu ambitus coercitus, electoresque arctiori sacramento obstricti: veteri quoque consuetudini, ne, defuncto Principe, concilia cogerentur, modus adhibitus: Præconsultoribus ac Decemviris ea comitia interdicta: gravioribus in rebus, quæ ad Reipublicæ statum attineant, Decemvirum collegium ac Senatum vocari posse, latum.

Graves ab inito Grimani principatu inter Clementem ac Venetos ob Cenetenſes controversiæ ortæ, quæ postea per multos annos Senatum exercuere. Ii cum in intimiore Venetarum ditionum sinu siti sint, non abs re futurum existimo, si ad ea, quæ de civitate Cenetenſi supra narraſi, nonnulla hoc loco attexam. Illud sane compertum est, cum maritimis rebus Veneti inclaruiſſent, atque in remotas Europæ Asiæque regiones signa ſuſtulſſent, tum demum imperium in continentem ad finitimorum injurias propulſandas protuliſſe; qui cum æquo animo præclaram florentemque Rempublicam aſpicere non poſſent, in æſtuariis ſitam urbem annibus, qui in

Marinus
Grimanus
Dux eligi-
tur.

Lex de
Præconſul-
toribus &
Decemviris
ad comitia
Ducalia
non admit-
tendis.

Ceneten-
ſes conten-
tiones.